

## CAPUT III.

## De suscipiente Sacramentum.

27. *Quæst. 1.* Quid requiritur, ut valide suscipiatur Sacramentum? Præmitto 1. solum hominem viatorem esse capacem Sacramentorum, cum solus viator sit capax primæ gratiæ, & ejus augmenti. 2. baptismum præire necessario oportere, ut cetera Sacramenta valide suscipiantur; cum Sacramenta sint instituta pro sola Ecclesia, nec homines sint de corpore Ecclesiæ, nisi per baptismum. 3. infantes valide baptizari, etsi intentionem habere nequeant, supplente Ecclesia, ut definitum est a Trid. *Sess. 7. de Sacram. Can. 13.* Idem dicendum de perpetuo amentibus, ut docent omnes TT. cum S. Th. Validum est etiam Sacramentum Confirmationis, imo & Ordinis, collatum infantibus, aut perpetuo amentibus, ut constat ex bulla Bened. XIV. *inter sollicitas*, edita 4. Maji 1745. His positis...

28. R. In adultis ad valorem Sacramenti requiri intentionem illud suscipiendi. Sed non sufficit intentio neutralis, qualem Cajetanus adstruit, scilicet qua homo nec consentiat, nec dissentiat; quæ opinio & contraria est D. Thomæ, & ab omnibus merito improbatur, nominatim vero a Bened. XIV. in *Instruct. de Bap.* ubi docet cum communi TT. sententia, non requiri in suscipiente Sacramenta intentionem actualem, aut virtualem, sed sufficere habitualem, id est, ali-

quando habitam, & non retractatam. Idque probat universalis Ecclesiæ praxis, quæ non reiterat Sacramenta Baptismi, & ordinis iis, qui ea suscipiuntur ex voluntate prius habita. Et hoc procedit in omnibus Sacramentis præter pœnitentiam, & Matrimonium, ut postea dicemus.

29. Unde validum est Sacramentum, collatum ebris, vel dormientibus, vel amentibus, qui prius habuerunt intentionem recipiendi Sacramentum, ut docet ipse Bened. XIV. cum D. Th. Suario, & communi TT. contra paucos alios. Nam Innoc. III. inc. *major* postquam dixit, eos non suscipere Sacramentum, si contrariam habuerint voluntatem, addit: *secus si habuissent propositum baptizandi; tunc enim characterem operatio imprimi Sacramentalis.* Apposite tamen animadvertit Suarez illicitum esse iis conferre Sacramenta, nisi in probabili periculo mortis, vel quando impedimentum usus rationis censetur perpetuum; alias expectandum est tempus, in quo suscipiens fiat compos rationis.

30. *Quæst. 2.* An aliquando sufficiat intentio interpretativa. R. affirm. circa suscipientes Sacramentum Extremæ Unctionis, ut docet communis sententia, & est consona Rituali Rom. de *Ext. Unct.* dicenti: *Hoc Sacramentum est præbendum sensibus destitutis, qui antea illud petierunt, seu verosimiliter petiissent.* Pariter conferendum esse Sacramentum Confirmationis usu loquelæ, & sensuum destituto, affirmant Lugo, Sporer, aliique multi; quod & de Eucharistia asserunt quoque multi cum Sua-

rez, Sporerio, & aliis. Sacramentum autem Baptismi, & Ordinis invalide confertur habentibus solum intentionem interpretativam, licet nonnulli conseant ad suscipiendum baptismum sufficere intentionem implicitam, contentam in contritione, vel attritione, suscipientis. Sed hæc sententia solum habere locum potest in infideli, qui semper invincibiliter fidem ignoraverit. Ad Sacramentum autem Pœnitentiæ requiritur intentio actualis, vel saltem virtualis, cum actus pœnitentis sint materia illius. Ad Matrimonium item requiritur virtualis saltem intentio, cum uterque conjux sit Minister Sacramenti in opinione magis recepta. Cum autem matrimonium fit per procuratorem, adest virtualis intentio, quia Procurator contrahit in virtute principalis.

31. *Quest. 3.* Quid opus est in suscipiente, ut cum fructu recipiat Sacramentum? R. 1. effectum, quem Sacramenta in suscipiente produciunt, esse duplicem. Primus est gratia sanctificans, seu habitualis: 2. gratiæ actuales, seu auxilia Divinæ gratiæ ad obtinendum finem proprium ejusque Sacramenti. Utraque gratia uberior est pro majori dispositione subjecti, cui confertur Sacramentum. Præter hos effectus communes omnibus Sacramentis, Baptismus, Confirmatio, Ordo imprimunt characterem, & ideo iterari non possunt. Poro ad suscipiendum characterem sufficit voluntas accipiendi Sacramenti in adultis, nam in infantibus nulla intentio requiritur.

32. R. 2. Ad effectum Baptismi, & Pœ-

nitentiæ requiritur præter voluntatem suscipiendi Sacramentum, actus fidei, & spei, saltem virtualis, ut omnes docent cum D. Th. item actus contritionis, vel attritionis, si baptizandus sit in gravi peccato ex Trid. Sess. 14. c. 1. Ad reliqua Sacramenta, quæ dicuntur *vivorum*, requiritur status gratiæ, eaque in mortali suscipere, est grave peccatum. Hinc qui gravis culpæ sibi est conscius, tenetur confiteri, antequam Eucaristiam suscipiat, ut præcipit Trid. Sess. 13. c. 7. Ad alia vero Sacramenta satis est, ut præcedat contritio, cum nullum extet confessionis præceptum. Ita communis TT. contra paucos alios.

33. *Quest. 4.* An Sacramenta *ficte* suscepta, remoto obice reviviscant? R. nullum esse Sacramentum, si *ficte* suscipiatur, ita ut deficiat intentio illud suscipiendi, ut nemo dubitat. Nomine ergo *fictionis* hic solum intelligitur defectus dispositionis necessariæ, ut licite, & cum fructu suscipiatur: scilicet an Sacramentum, remoto peccato per Pœnitentiam, suum effectum consequatur? De Baptismo conveniunt omnes, si Scotum excipias. Estque doctrina expressa SS. Augustini, & Thomæ. Nam Aug. lib. de bapt. contra Donat. c. 12. ait; *in illo, qui fictus (ad baptismum) accesserat, tunc valere incipiet, cum illa fictio in veraci confessione recesserit.* Angelicus autem 3. p. q. 96. ar. 10. ait: *impeditur autem quandoque per fictionem; unde oportet, quod remota ea per pœnitentiam, baptismus statim consequatur suum effectum.* Idem docet D. Th. de Sa-

cramento Pœnitentiæ valido, sed informi.

34. *Quest. 5.* Quid sunt Sacramentalia, & quomodo gratiam conferunt? R. sunt ritus seu actus externi Religionis, ad colendum Deum accommodati. Tales vocari solent oratio Dominica, aqua benedicta, usus eulogiarum, confessio generalis, benedictio Episcopi, eleemosyna. Ad hæc etiam revocantur tussio pectoris, exorcismi, insufflationes sacræ, & similia, partim ab Apostolis, partim ab Ecclesia postea instituta, quæ vim habent remittendi peccata venialia, ut docent TT. omnes cum S. Thoma 3. p. q. 87. Utrum autem per Sacramentalia condonentur venialia *ex opere operato*; an solum, prout nobis excitant pios motus doloris, aut caritatis, non convenit inter DD. licet hæc ultima sententia communior sit, & D. Thomæ doctrinæ magis consona. Suarez, Lugo, & alii.

35. Quandoque Sacramentalia, operantur beneficia corporalia, v. g. sanitatem, fugam Dæmonis, & similia, sive id fiat per modum impetrationis, sive per specialem virtutem eis a Deo collatam. Inter Sacramentalia numerantur *Agnus Dei* ex cera a Papa benedicta, quos inaurare, aut pingere, vetitum esse sub excommunicatione, ait Azorius. Vendere autem eos ratione materiæ licitum est; erit autem simonia, vendere eos carius, quia sunt benedicti. Non licet uti candelis, & aqua benedicta ad usum profanum; cum sint res sacræ, & sancte sint tractandæ. Non erit tamen peccatum, quicquid dicat Gretserus, ossa agni benedicta, &

putamina ovorum canibus projicere, modo non sit contemptus rei sacræ. Missalia, Biblia sacra, sic ut & sacræ imagines non sunt adhibendæ ad usus profanos. Secus vero de aliis chartis, in quibus forte scripta sint nomina sacra. Ita-Gobat, & La-Croix.

## TRACTATUS II.

### DE BAPTISMO, ET CONFIRMATIONE.

#### CAPUT PRIMUM.

##### *De Baptismi essentia, & conditionibus.*

1. **B**aptismus græce ablutionem, sive immersionem in aqua significat. Triplex autem distingui solet; *fluminis* de quo postea; *fluminis*, & *sanguinis*. Baptismus *fluminis* est perfecta conversio ad Deum per contritionem, vel amorem Dei super omnia cum voto, vel desiderio suscipiendi baptismum aquæ. Supplet hujus vicem secundum Trident. *Sess. 14. cap. 4.* quoad remissionem culpæ, licet non imprimat characterem, nec tollat omnem reatum pœnæ. Dicitur autem *fluminis*, quia fit per Spiritus S. impulsum, qui dicitur *flamen*. Fides autem docet, per illum homines etiam salvos fieri ex Trid. *Sess. 6. c. 4.* dicente, neminem salvari posse sine *lavacro regenerationis, aut ejus voto.*

2. Jam vero baptismus *sanguinis* est mors,